

Ulloq: 29.09.17

Uunga siunnersuut: Kommunit aqunneqarnerat pillugu Inatsisartut inatsisaat nr. xx, xx. xxx 2017-imeersoq.

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

Siumumiit imatut oqaaseqarfigissavarput,

Manna ukiualunngortuni nunaqarfimmi aqutsisut aningaasatigut annerusumik aqutsinermik piginnaatitaanatik ingerlatsisimasut, pisinnaatitaaffilerneqarnerat inatsisikkut anguniarneqartoq pisariaqalersimavoq.

Siusinnerusukummi Kommunalbestyrelsip ilaasa tamanna nunaqarfinnut aqutsisunut piginnaatitaaffigitissimavaat apeqqutaalluni kommuni sorleq aamma aningaasatigut qanoq atugassaqartitaaneq ilaatigut tunngavigalugu atuutsitsisoqartarluni. Ineriartorneruttaaq malittaani maanna kommunit killeqarfimmikkut allannortiterneqarput, tamanna aamma pisariaqalersitsilluni nunaqarfinni aqutsisutulli illoqarfiit Borgmesterimik angerlarsimaffeqarfiutigisut najukkani ataatsimiitsitaliaqarneq periarfissaatillugu sunnuteqarsinnaatinnissaat anguniarneqarmat.

Inatsimmi *“nunaqarfinni aqutsisut”* atorneqartoq inatsit manna aqutigalugu taaguutaatigut allannortittariaqannginnersoq ilanngullugu nalilersorneqassasoq apeqqutigissavarput, imatut taaguutaa oqaasertalerlugu: Kapitali 5 *“nunaqarfinni siulersuisut”*.

Maanna kommunit kattuffeqarnermikkut ataatsimoorussisinnaanngineranni kommunit naligiimmik periarfissaqarnissaat pingaaruteqarpoq, neriuutiginarporlu kommunit ataatsimut suleqatigiiffeqarnermikkut nalorninaatsumik aaqqissuussinissaat tamannami aqutissiuunniarneqarpoq.

Kommunit naligiittutut isigissagutsigit eqqarsaatigissallugu pingaaruteqarpoq kommunit katersuuffigisaannik naligiimmillu toqqammaveqarlutik periarfissaqarnissaat eqqarsaatigalugu suleqatigiiffeqarnissaat, tamannalu kommunit suliassaraat, inatsisikkullu tamanna qulakkeerniassallugu pingaaruteqarpoq.

Taamaattumillu saqqummiunneqartut inatsisit naleqqussartuarnissaat eqqumaffigissallugu pingaaruteqarpoq

Ukiuni aggersuni kommuninut tapiissutit minnerunngitsumillu oqartussaaffiit kommuninut akisussaaffinngortinneqartussat eqqarsaatigalugit, kommunit kaammattorusunnarput isumaqatigiiffigisinnaasaminnik suleqatigiiffeqarnissaat kommuninummi akisussaaffiit nussorneqartussat ukiuni aggersuni suliariniarneqarput aallartisarneqarlutillu,

Kommunit aqunneqarnerat pillugu inatsisartut inatsisaat siunnersuutigineqartutut 1. januar 2018 atuutilertussatut innersuunneqarnera ilanngullugu taperserparput.

Taamatullu oqaaseqarluta ataatsimiititaliami susassaqartumi aappassaaneerneqartinnani suliarineqarnissaa inassutigaarput.

Jens Immanuelson

Siumut